

東
華
續
錄

東華續錄

咸豐四十

臣王先謙敬編

臣陶澐宣恭校

九月丁卯朔僧格林沁等奏近來逆匪思竄愈急八月二十四五等日該逆連次撲營均經擊退據投出難民供稱賊巢糧米已無惟食黑豆並聞該逆製造呂公車及掘挖地道總要搶死撲出等語見在周圍壕溝嚴密布置足以破其地道並有梅花坑數重及大小木椿雖有呂公車亦難逼近惟該逆窮蹙已極防守益堅臣等與各營官熟思妥議深恐貪功輕進徒折精銳於事無濟以見在賊勢而論人心不固糧米缺乏撲則不敢守則無糧斷難久稽顯戮一有可乘之機卽當督兵進剿可望就地殲除臣等惟有嚴飭各營加意防範仍隨時設法圖維務期迅速蕩平上諭軍機

大臣等朕日盼捷音速奏而每覽奏摺幾成習見套語毫無出奇制勝之處實屬不解逆匪所掘大坑我兵既能填墊是逆匪所伏地方我兵亦能前往並非重濠之隔遂成天塹何以不令各路合力進攻徒以加意防範爲說且閱摺內所敘賊撲慶祺營盤則慶祺營中官兵自爲抵禦賊撲僧格林沁營盤則僧格林沁營中官兵自爲抵禦直是分段巡防各不相顧並不爲聯絡進攻之計轉瞬天氣漸寒儻隄水凍結該逆另起詭謀又將作何防範僧格林沁旣稱該逆撲則不敢守則無糧卽此豈非可乘之機猶稱有機可乘卽當進剿究竟如何始爲進剿機會虛詞搪塞至於此極朕實爲之愧恨著僧格林沁卽行督飭各路官兵設法進兵剋日攻破賊巢不得再以徒折精銳爲詞布置嚴密爲解任令該逆日久負隅將此由六百里加緊諭令知之○戊辰諭軍機大臣等王懿

德奏漳州等營官兵因防勦喫緊未能調赴江南一摺覽奏自係實情卽照所請辦理至前令該督調漳泉兵一千名赴粵當已接奉諭旨廣東土匪蠭起連失郡縣省城四面受敵萬分危急閩粵壤地毗連赴援較近著王懿德遵照前旨於該省各營內迅速抽撥兵一千名派委得力員弁管帶剋日啟程前赴廣東省城候調毋許稍有遲誤粵省待援甚急與江南情形迥異該督斷不准再有推諉自干重咎所有該官兵啟程日期並著卽行馳奏將此由六百里加緊諭令知之○裁雲南各營步兵守兵三千九百八十二名○己巳楊需奏八月二十四日夜賊船二千餘隻由襄河湏口蔡店擁撲漢口搭造浮橋圍攻我兵營壘當經會同藩魁玉楊昌泗等水陸截勦縱火焚燒礮船堵遏江口賊船盡爲灰燼火光照耀百里徹夜不絕賊匪二萬餘人斬殺焚燒溺斃不可計數竄

逸者不及十分之一並皆薙髮四散

臣

當派知府栗耀馳赴漢陽

安撫商民搜捕餘匪桂明帶兵馳赴黃岡一帶集團堵剿收復黃

州武昌各郡縣

臣

於二十七日拔營赴省滿營馬隊及甯夏延綏

等營官兵畱駐楊店聽候調遣計北境業已無虞下游沿江州郡

尙爲賊踞卽應會同曾國藩等水陸並進以冀一氣掃除伏查安

徽江西江南賊尙未平楚北皆與接壤大江上下帆檣瞬息往來

控扼非易與其屯兵久戍勞費而終無把握不若乘此湖南兵氣

方揚賊匪喪膽之際約會江西進攻九江安徽會剿夾擊以戰爲

守作一勞永逸之計

臣

擬到省與曾國藩等熟商將兵勇酌量遣

回湖南及畱於湖北防守各選精銳帶同礮船水陸下擊直抵江

南協助向榮等剋期掃蕩塔齊布曾國藩奏八月初三日

臣

塔齊

布督兵馳抵崇陽縣距城里許該逆二千餘人分三路抗拒我軍

亦分三路衝擊斬其前鋒逆黨敗竄過河半回縣城拒守我軍一面飛渡窮追一面圍城急攻共殺賊百餘名城上槍礮如雨兵勇裹創前進鏖戰四時至暮始行收隊初四日黎明臣塔齊布復督將弁攻城羅澤南等亦由桂口沙坪接勦而至探明賊勢併注西城遂先攻東北二門以分賊勢選壯士二百人埋伏城根隨督大隊奮攻西門城上連放槍礮拋擲瓦石我軍冒險力攻旋用劈山大礮轟破西門一擁而入前埋伏之二百人亦從北城根肉薄而登四門截殺斃賊約二百人餘匪由東門過河逃竄又追殺百餘名立將縣城克復崇陽向爲亂民萃聚之藪自鍾人傑後反者數起今年賊目廖敬瞬踞爲老巢盤踞數月資糧盡聚其中悍賊數千嬰城死守又山路險峻城小而固非兵勇奮不顧身未易破此堅城也臣塔齊布卽於初六日拔營前進派羅澤南等先赴咸甯

初八日紮官塘驛探明武昌賊黨八百餘人從金牛地方招集崇陽逃匪乘虛而入踞城抗禦阻遏大軍羅澤南等於初九日馳抵城下賊從東門潰出竄至十里外之官步橋忽回駐要隘分路埋伏我軍分路進追繞出賊伏之後賊遂向北路竄去我軍沿途截殺追奔十餘里斃賊八十餘名生擒二十餘名水軍戰船自前月二十七日金口獲勝後該逆不敢上犯已革副都統魁玉總兵楊昌泗帶兵勇四千三百人來會紮金口之西岸同知銜李光榮帶川勇千餘人亦至紮金口之東岸皆荊州將軍遣來協剿者也初八初十等日官軍在沌口一帶巡哨遇賊屢戰水陸接應斃賊無算該逆奔退回巢臣曾國藩已於十一日進紮金口臣塔齊布自崇陽咸甯沿途剿賊北來雖明知賊匪未淨大兵一過仍虞嘯聚各縣然武昌爲省會重地拔其本根則枝葉自萎勢不能兼顧小

股止得飛速進兵直搗武漢以圖迅復鄂垣 上諭軍機大臣等
賊船由襄河潰口蔡店擁撲漢口經會國藩魁玉楊昌泗等水陸
截剿斬殺焚溺不計其數南北兩軍辦理均甚得手楊需於二十
七日拔營赴省自可與會國藩通籌全局爲水陸並進之舉惟武
漢新復應如何酌留兵勇防堵使賊匪不得乘虛覬覦方爲妥善
見派桂明帶兵馳赴黃岡一帶督同許廣藻等督率練勇鄉團堵
剿如能收復黃州楚境一律肅清即可乘此聲威水陸並進會同
江西兵船下攻九江直達安慶該署督等相機辦理務臻妥協至
馬隊及甯夏延綏等營官兵畱駐楊店即可爲北路聲援前據楊
需奏武漢克復尙有賊萬餘並此次竄出沙口之賊爲數尙復不
少此時攻剿下游仍須厚集兵力會國藩等本日奏報尙係克復
崇陽其攻剿武漢情形仍未奏到塔齊布陸路官兵此時諒與會

國藩水路合爲一軍著俟楊需抵省後商權挑選精兵水陸進剿
朕日盼捷音之至也所有克復武漢情形著楊需塔齊布曾國藩
迅速馳奏將此由六百里加緊各諭令知之○曾國藩奏謝賞三
品頂帶恩並以守制未終陳情懇辭得旨殊不必如此固執汝能
國而忘家鞠躬盡瘁正可慰汝亡親之志盡孝之道莫大於是酬
庸褒績國家政令所在斷不能因汝請稍有參差汝之隱衷朕知
之天下無不知也○庚午向榮奏查上方橋西賊營經官軍連次
攻剿仍復負隅堅守見當禾稼秋成探聞該逆於鐵星橋河定橋
一帶日肆焚掠雖經派去兵勇節次擒斬數百人而板橋善橋一
帶嘯聚甚眾亟應設法圍剿幸探得蕪湖之賊業於十一日被涇
太義勇擊走收復縣城臣飛調已革總兵王鵬年等迅帶浙江兵
勇由甯國出堵蕪湖已於十六日齊到該處紮營鄧紹良一軍亦

由高瀋調至太平屯紮蕪太陸路之賊漸清惟采石沿江以下尙有逆黨時來擄掠臣見檄飭鄧紹良帶領兵勇一千二百餘名由慈湖銅津沿江直取江甯鎮進攻板橋善橋並由大營抽撥楚兵五百名令副將傅振邦帶往秣陵關與前派參將長桂所帶兵勇六百名齊往江甯鎮會合統歸鄧紹良調遣攻勦如能得手則與大營聲勢相聯上方橋賊巢前後受敵不能固守方可一律掃蕩惟吳全美所帶紅單船自前月泊駐采石磯後水路接濟已斷該逆始傾巢出戰陸路復被大創賊情正深恐懼臣方催提紅單船進攻東西梁山節節扼勦而上庶水陸上游皆爲我有實收復金陵一大轉機乃該總兵忽藉口於揚州大營札調回攻九洲洲並不候臣檄飭遂於十一日駛至浦口以下實屬坐失事機經臣專弁嚴行檄斥始以待解糧餉子藥爲詞繼又以帆纜微脆應須更

換爲推諉之計見在上游賊船麕聚乃自放開江路致令聯檣竄下接濟復通賊餒未免復熾茲已特派副將蔡應龍前往督催責令吳全美卽將所帶紅單會同葉常春之挖營各船趕卽駛上金陵由江甯鎮勦洗前進以期會合鄧紹良陸兵扼駐上游江面然後將兩梁山一帶賊營全行洗蕩再由蕪湖直溯池州則皖江以南無復賊蹤蘇杭門戶自固然後以全力規復金陵便有把握見聞該逆已於夾江九洑洲之間用糧船排列復於下關南北兩岸用鐵練中貫巨木橫截江面並有礮船游弋意欲阻我師船上攻之路臣已飭總兵陳世忠挑派閩勇赴浦設法斷其鐵練不至有礙江路並飭令吳全美等就便協勦但俟東北風轉卽仍督船上擊庶可早靖逆氛上諭軍機大臣等前因東西梁山賊船較多是以諭令托明阿等於陳國泰所帶船內撥赴上游已據奏稱派

撥十隻前往與吳全美合力堵剿合計紅單船已有三十餘隻兵力較厚自當力扼上游使賊船不能下竄於剿辦機宜最爲緊要乃據向榮奏稱吳全美藉口於揚州大營札調回攻九洲輒駛至浦口以下經該大臣嚴行檄斥復以待解糧餉子藥及更換篷纜爲詞種種推諉實出情理之外該總兵統帶師船係歸向榮節制各兵勇轟擊賊船本極奮勉若帶兵大員意存退縮勢必又蹈艇師疲玩積習當此攻剿喫緊之際豈容任意顛預著向榮嚴催該總兵迅赴上游並著托明阿等飭令陳國泰將所撥紅單船十隻飛速上駛不准片刻耽延儻再不遵調遣卽著該大臣等從嚴參辦據楊需奏武漢見已克復湖南水師指日卽可下駛至黃州九江等處見在蕪湖業已收復若兩路夾擊梁山一帶賊船自可剋期殄滅該大臣務當乘此機會併力攻剿毋稍遷延其金陵逆

匪接濟尤當設法嚴斷毋令到處焚掠涇太義勇收復蕪湖縣城情形著查明具奏向榮所獲逆書已由軍機大臣呈覽矣將此由六百里加緊各諭令知之○諭前因江西武甯等處賊匪未盡肅清恐武漢克復後餘匪逃竄勾結令陳啟邁於湖北接境地方嚴防茲據陳啟邁奏賊船復犯吳城盡被官軍焚毀惟由瑞昌翻山越竄之賊雖被遊擊景星等追殺逃回興國其義甯西路苦竹嶺一帶亦經吳錫光擊回湖北究恐去而復來未可以目前小有勝仗致疏防範且江西地面北鄰楚省南接粵東見在韶連各屬粵匪紛起竄擾長甯龍南等縣均經兵勇擊退該撫仍當嚴飭鎮道等迅速勦捕淨盡其由楚入江路徑不但叢山密箐皆可伏匿前此楚賊由崇通竄越屢窺武義卽爲前車之鑒昨據塔齊布曾國藩奏崇陽克復咸甯大獲勝仗係在攻克武漢以前楊需亦奏稱

漢川黃陂等處漸就肅清是湖北剿辦得手江西更形喫重陳啟邁身任疆圻粵匪楚匪均應籌防不可稍形疏懈至吳城賊船雖已剿淨安慶江面灣泊尙多卽防陸防江亦須兼顧若曾國藩等水軍能與塔齊布各軍水陸並進會同江西兵船前後夾擊江面自可漸就肅清昨已寄諭楊需等相機辦理陳啟邁總當防剿兼顧與楊需等互爲聲援勿稍疏失將此由六百里加緊諭令知之

○塔齊布曾國藩奏臣曾國藩進駐金口後八月十二日乘小舟赴沌口相度形勢李孟羣等率戰船隨往突有逆船數十來鈔陸賊千餘沿江撲犯我戰船以少半擊江中之船以強半擊岸上之賊頃刻閒屍橫徧地岸賊敗退逆船亦卽下遁陸軍自咸甯大勝後臣塔齊布率各營直趨省會飭知府羅澤南都司彭三元普承堯等先行十三日探明橫溝橋地方聚賊六七千人意圖阻遏官

軍並分伏兩旁以圖鈔尾羅澤南等分路進攻賊勢大潰追殺百餘名賊之埋伏兩山者復經接殺二百餘人十五日羅澤南等進紮紙坊距鄂城六十里十六日臣塔齊布亦至十七日偕羅澤南同赴金口與臣國藩會議進兵先後查逆黨盤踞武漢約共二萬餘人自沌口以下東西兩岸水陸賊營密布連日再四詳究進攻武昌之路有三一爲古驛路由油坊嶺以達洪山一爲新驛路由湖隄以達板橋一爲沿江之路由金口以達花園進攻漢陽之路亦有三一爲沿江之路由沌口以達鸚鵡洲一爲襄河之路由蔡店以達西門一由襄河建瓴而下臣等悉心定議必以水師先勦江面使武漢之賊消息隔斷陸路則先攻武昌後攻漢陽臣塔齊布暫駐紙坊總要之區遣羅澤南等由金口一路先攻花園賊營然後由古驛路進攻洪山至西岸沿江一路則令魁玉楊昌泗等

率荆兵進攻一面咨明署督臣楊需夾攻漢陽之背以期諸軍會合迅復堅城雖據稟崇陽餘燼復合戕官踞城而陸軍單薄暫時不及分兵回剿俟攻克鄂城後再行四路遣征報聞○辛未塔齊布會國藩奏八月二十一日臣塔齊布由油坊嶺進發扼東北洪山總匯之區臣國藩在金口定議沿江三路齊下之策湖南陸軍羅澤南等三千人及荊州派來李光榮川勇千人攻東岸花園賊營魁玉楊昌泗四千三百人攻西岸蝦蟆磯賊營水師戰船從中流飛駛衝過鹽關之下直至鸚鵡洲該逆不意我軍之卒出其後也卽回船下救我軍分兩翼上下繞擊賊勢不支紛紛落水楊載福等縱火延燒頃刻之間鹽關二百餘號賊船焚毀盡矣羅澤南等攻花園賊營分爲三路同進賊自木城開礮子如雨點我軍奮力直入賊眾大潰縱火焚其營壘是時西岸魁玉等亦攻破蝦蟆

礮賊營縱火焚之賊眾四竄伏兵圍勦屍橫徧野楊昌泗窮追直下與水軍夾擊復破鸚鵡洲賊營李孟羣楊載福等乘勝又攻破漢關等處賊營三座遂徑攻鮎魚套口復燒毀賊舟數十號二十日李孟羣率前營先發攻燒鮎魚套未盡之船旋即西渡攻漢陽朝宗門土城楊載福蕭捷三秦國祿等仍衝過賊營直擊塘角何越珽亦衝過賊營直攻漢陽漢口焚燒賊船無數兩岸賊營悉數踏平自有此兩日大戰省河上下無一賊船武漢城外無一賊營臣等知其萬無可守之理二十三日卯刻水陸各營豫備攻城武昌之賊已於四更後潛開東北門逃竄猶畱悍賊數百在西南城搖旗放礮故作堅守之狀漢陽城上亦然我水軍及東路陸軍用火礮向漢陽望山等門轟擊而別遣壯士從僻處攀堞而登舉火爲號各營擁入眾賊奔竄截殺九百餘人生擒二百餘人西岸

漢陽城上之賊方與水師連礮對擊楊昌泗之兵勇已自南門梯
繩而入魁玉督帶各營在西門外月湖隄一帶埋伏該逆由西門
奔赴蔡店被伏兵截斃殲斃無數生擒二百餘名午未之間兩城
同時克復臣塔齊布從油坊嶺來知武昌東北洪山一帶爲陸路
竄賊必由之地豫飭大隊四路埋伏該逆不料我軍猝至前臨大
敵後偏危城左近梁子湖右隔湯孫湖無路逃生拼死抗拒我軍
分路迎擊賊向洪山之背大奔我軍搶登山脊乘勢追北殲斃約
六七千人餘眾圍偏沙湖塘角灣地方紛紛赴水溺斃二千餘人
二十四日臣等先後入城履勘街道撫綏子黎見已飛咨湖北巡
撫兼署督臣楊需請其迅速渡江鎮撫會城一面妥籌分路進剿
事宜所有此次尤爲出力各員相應開列可否先行獎勵之處出
自皇上天恩上諭內閣上年江皖回竄之賊重擾漢陽漢口

於今夏再陷武昌疊經降旨令塔齊布會國藩於收復岳州後分督水陸兩軍埽蕩沿江賊壘乘勝直擣武漢茲於八月二十一二等日武漢兩城同時克復三日之內焚舟千餘踏平賊壘淨盡運籌決策甚合機宜允宜立沛殊恩以酬勞勩楊需著補投湖廣總督會國藩著賞給二品頂帶署理湖北巡撫並加恩賞戴花翎塔齊布著賞穿黃馬褂並賞給騎都尉世職廣西升用道李孟羣著賞加按察使銜並賞給珠爾杭阿巴圖魯名號候選知府羅澤南著記名以道員用候選知縣李續賓著以直隸州知州升用並賞換花翎遊擊楊載福著以參將補用並賞加副將銜守備蕭捷三著以都司升用並賞換花翎都司彭三元著以遊擊補用守備唐得陞著以都司升用並賞換花翎同知銜文生李光榮著以府經歷縣丞遇缺卽選已革副都統魁玉已革總兵楊昌泗均著加恩

開復原官其餘出力文武員弁兵勇著曾國藩塔齊布查明保奏
候朕施恩○諭軍機大臣等塔齊布曾國藩奏水陸大軍同日攻
克武漢二城一摺覽奏欣慰已明降諭旨分別加恩並令將出力
員弁擇尤保奏矣此次兩城克復聲威大振北竄餘匪復經楊需
疊次剿殺漸就廓清是楚省大局已定卽應分路進剿由九江安
慶直抵金陵埽清江面曾國藩雖係署任巡撫而剿賊之事重於
地方自湖南東下水陸各路官軍必須該署撫與塔齊布會同調
度方能人人用命斷不能株守省垣楊需昨奏已於二十七日拔
營赴省諒已與曾國藩塔齊布晤及應如何分兵前進如何畱兵
防守當已計議周妥楊需所稱會同曾國藩等各選精銳水陸夾
擊湖北善後事宜交臬司等妥辦似該督亦擬督師出境但此時
黃州未復胡林翼尙在岳州曾國藩等水陸大軍正在建瓴破竹

之時萬難坐待省城布置完善再同該督前進且大江風信靡常逆踪回竄固應嚴防卽崇陽等處餘匪鈔襲我軍之後亦甚可慮自宜酌畱大員督辦以爲大軍後路聲援若專委之臬司誠恐呼應不能甚靈著楊需與會國藩塔齊布妥速商定卽行具奏會國藩以殺賊自任必能謀定後戰計出萬全楊需遇事持重審度精詳諒不至孟浪同進致令楚境空虛也昨據塔齊布等奏有崇陽除燼復合戕官踞城之語是否所畱鈕芳津等荆勇續有挫衄陳啟運昨奏亦稱楚匪窺伺德安義甯經江西兵勇勦敗竄回楚境難保不係此股回撲著楊需迅卽派兵前往撲滅並飭桂明督同許廣藻收復黃州等處城池果能一律肅清則桂明之兵卽可由黃梅廣濟一帶閒道斜出仍與會國藩等會合庶英山太湖賊援亦斷皖省勦辦亦易得手塔齊布所帶陸兵旣單魁玉楊昌泗之

兵應否合爲一軍隨同東下亦著曾國藩與塔齊布妥籌調遣並
約會陳啟邁飛派兵船礮船由九江出剿以爲水路奇兵勿令該
逆旁竄鄱湖又與義甯等處陸匪勾結復致蔓延崇通一帶總之
江面必須急剿餘匪尤宜嚴搜沿江剿賊之事朕以責之曾國藩
塔齊布楚省防賊回竄及搜捕江北等處餘匪事宜朕以責之楊
需該督等務當協力妥籌不可稍存大意卽官文意有所見亦可
與楊需會商慎勿各存成見致誤事機武昌漢陽殉難及逃避文
武實迹見在當可詳查著卽迅速查明分別具奏將此由六百里
加緊各諭令知之○塔齊布曾國藩奏報官軍克復武昌漢陽兩
城得旨覽奏感慰實深獲此大勝殊非意料所及朕惟兢業自持
叩 天速赦民劫也○王申諭軍機大臣等蔣霽遠奏調兵剿捕
桐梓縣匪徒一摺貴州桐梓縣匪徒楊瀾等膽敢糾夥千餘人擁

入縣城打毀衙署監獄見經該撫調集官兵前往勦辦著卽嚴飭炳綱督同參將彭長春迅速相機撲滅惟據稱匪黨僅有千餘何以檄調官兵至四千餘名之多是否匪黨不止此數該撫不肯遽行入告畱爲續奏地步軍務重情豈可稍有粉飾著蔣爵遠迅將該匪滋事實情形究係因何起釁地方官有無辦理不善以致激變之處及曾否蔓延他處確切奏聞該縣文武下落並著速查具奏將此由六百里諭令知之○癸酉予安徽陣亡訓導王承福祭葬世職○甲戌僧格林沁等奏逆匪自初一日逐日結隊出巢不敢直前奔撲近於前次拆毀破村窆潦築壘惟恐另生詭謀初四日馬步官兵分路進勦直至連鎮賊濠該逆由連鎮李莊分爲三路傾巢出拒我馬隊官兵分兩翼迎勦步隊中路進逼各隊官兵槍箭齊施練勇短兵相接斃賊無數該逆不能抵禦敗回巢穴

當經兵勇將前次折毀破村濠溝全行墊平撤隊而回是日之戰約斃賊匪一百餘名初五初六等日陸續逃出難民供稱賊匪屢次受創萬分情急兼之糧米缺乏僅食黑豆急於舍死奔撲見在賊巢製造呂公車二十餘座定於初十前後拌命向北面奔竄惟有加意嚴防仍督飭各路官兵設法進攻斷不敢任令該逆日久負隅自蹈重戾上諭軍機大臣等逆匪占踞村莊並無城郭之固僧格林沁等圍攻五月有餘究竟如何擣穴擒渠尙無成算且賊糧缺乏僅食黑豆等語朕耳聞已熟若賊巢中果無糧米則夥黨勢必瓦解豈有仍以黑豆苟延數月之理僧格林沁性情誠樸或不免受人欺蒙見在賊匪製造呂公車欲於初十日前後向北奔撲卽應加意防範然與其防賊出撲不如督兵進攻先發制人兵家勝著該大臣等務當趕緊攻剿勿但以小勝塞責並以進剿

過猛恐傷精銳爲詞遷延時日至軍士隨征已及一年更宜加以激勵迅將此股殲除解甲釋戈共相休息如久令負隅抗拒僧格林沁亦何以對各營將士耶將此由六百里加緊諭知僧格林沁並諭西凌阿知之○諭托明阿等奏金陵賊匪木簪下駛嚴飭水師剿除一摺逆匪於金陵下關駛出木簪二座護以船礮沿南岸下駛經浦口兵勇將賊船擊退而該匪木簪由江心大溜直奔下游李德麟等帶領局艇既不能奮力追擊陳世忠督率師船在段要口又不能認真截剿所稱轟斃賊匪多名毀塌木城瞭臺殊難憑信至陳國泰所帶紅單船最爲得力何以於土橋江面不能堵扼木簪尤堪詫異可見管帶水師將弁因循積習幾於牢不可破吳全美既不遵調遣駛赴下游陳國泰又不能攔截該匪木簪任其乘夜衝突直赴下游該大臣等統領全軍若不力求振作致令

紅單各船亦如李德麟等所帶師船不能得力貽誤之罪又將誰
誤見在逆匪木簞駛泊鎮江南岸必係窺伺完善之區尤爲可慮
自應一面嚴防金陵賊簞續行衝下一面將見在木簞用火攻燬
除儻陳世忠在段要口不能扼截張攀龍陳國泰等不能迅速攻
剿卽著該大臣等從嚴參辦毋稍瞻徇九洲與南岸七里洲均
有賊營該處江面甚窄兩岸賊礮對發又於中流排列巨艦橫亘
鐵鎖意在阻我舟師必應設法擊毀李德麟已折回浦口卽著嚴
飭該員等會同武慶速將洲地賊營概行轟洗毋再玩延並著督
令余萬清實力防剿迅圖克復鎮江梁山賊船既多難保不乘勢
下駛向榮務當督飭吳全美力扼上游使賊勢不能聯絡瓜州逆
匪仍著托明阿等於水陸兩路亟圖進剿毋得坐失事機雷以誠
見赴焦山親督礮船與陸路諸軍會合環攻如將賊簞擊毀卽著

迅速馳奏以慰廬念將此由六百里加緊各諭令知之○塔齊布會國藩奏官軍自克復武漢兩城鄂省上下二百餘里大江已無賊船惟襄河之內賊船尙多二十四日探報賊船千餘已由蔡店順流而下將出大江與官軍決一死戰魁玉楊昌泗親督荆兵防勦陸路臣國藩卽派水師各營以大船錯布漢口內外而以三板迅入迎擊行僅數里該逆已連檣而下其首隊自楊林溝登岸者約二千人經魁玉等鈔擊賊眾敗潰適戰船雷轟而入該逆開砲抵敵以河身太窄賊船太擠不能回旋取勢倉皇失措我軍乘隙偏入拋擲火毬火箭賊匪向南北岸亂竄經陸軍殲斃無數水師復乘勝追及上游賊眾大潰自三更以後賊船逃竄一空我軍行二十餘里至羅家墩地方將賊船千餘號悉數燒盡四更始行收隊蓋緣漢水偏窄乘賊擁擠喧亂之時擊之又荆州陸路之兵兩

岸被害之民亦乘閒縱火是以二十餘號戰船用力甚少成功甚多自有此戰襄河以內賊舟無幾更酌畱船隻徧爲搜剿從此一意東下無後路牽掣之虞矣然臣等細察大局尙有可慮者數端水師搶船太多私匿贓貨頗有飽則思颺之意又屢勝之餘志驕氣溢暗伏挫敗之機此其可慮者一也武昌竄出之賊雖在洪山殲去數千然逃者尙多漢陽竄出之賊見皆逃歸蘄黃一帶尙有數萬崇陽興國蘄州黃孝等處亂民尤多設官軍稍有挫衄則四面皆賊餉道易斷此其可慮者二也水陸兩軍銀錢子藥皆取給於湖南此後去湘日遠輪轉尤難一有缺乏則軍士潰散前功盡棄此可慮者三也見在機勢大有可乘臣等急思東下以圖克復沿江諸城然念此三者步步艱難又不能不熟思審度縷陳於

聖主之前

上諭本日據塔齊布會國藩奏搜剿襄河賊匪以二

十餘號戰船焚毀賊舟千餘隻見在河內逆船無多當可悉數殲除是上游如安陸襄陽南北枝流如德安孝感沔陽荊州等處均可無虞牽掣曾國藩等可以揚帆東下肅清江面據稱細察大局尙有三端可慮等語自係實情武漢逃匪皆歸下流蘄黃一帶賊尙數萬此次東出長江不得不倍加慎重況屢勝之下兵勇氣驕轉餉稍遲軍心渙散所籌皆思患豫防之策已諭令裕瑞葉名琛柏貴陳啟邁籌款撥解以資接濟惟攘外必先安內此時黃州尙未克復崇陽亦有復踞之信均應酌分兵力剪除餘匪省垣善後事宜楊需固責無旁貸至曾國藩等以剿賊自任雖當乘此機會急思順流而下以次攻復沿江諸城然須計出萬全謀定後戰方無挫衄之虞著楊需等悉心布置地方之事朕旣已責之楊需則嚴遏亂萌保護餉道該督必須節節妥籌曾國藩塔齊布方能專

意勦賊其水陸弁勇等務須開誠布公消其驕悍之心鼓其勇敢之氣策勵撫綏寬猛兼濟至出力將士尤須及時酌保不可使有缺望會國藩處事精詳必能與塔齊布妥爲駕馭若能由九江安慶直抵金陵使長江數千里盡蕩妖氛則從征將弁朕必破格施恩以酬懋績將此由六百里加緊各諭令知之○諭和春等奏連日誘賊出巢攻勦獲勝並舒城巢縣等處擊敗賊匪情形各摺片此坎廬州得勝門南門突出賊匪各千餘名經江忠濬等帶勇擊勦和春等復親督吉順嵩瑞等帶領兵勇三面合攻斃賊七八百名秦定三攻勦舒城賊匪亦有斬擒其由裕溪口來至巢縣之梁山賊船復經忠泰等督兵擊退覽奏各情仍不過小有斬獲並無制勝之策似此曠日持久雖屢報勝仗究於大局何裨昨據塔齊布等奏督飭兵勇克復武漢水陸各軍指日東下沿江一帶攻勦

得手便可直抵安慶進扼金陵該提督等務當隨時偵探塔齊布等統兵到皖時應如何派兵策應合力夾擊均須豫籌妥辦廬州賊匪經官兵屢次殲剿爲數當已無多和春等務當激勵將士併力進攻聚而殲旃勿畱餘孽一面嚴飭地方團練兵勇斷賊接濟尤爲要著其關山一路雖經派有恩錫帶兵駐守該處爲南北要隘該提督等仍當隨時查察並知照袁甲三先將烏江等處賊船盡行剿除庶下游賊踪不至續行上竄秦定三攻剿舒城已經數月總未能克復縣城著卽飭令乘勝進攻毋再多延時日前據向榮奏蕪湖城邑見已收復並經派兵駐紮該處是否足資防堵東西梁山賊船屯聚尙多難保不紛竄肆擾並著嚴飭忠秦等加意防範仍迅圖攻復巢縣不得稍有延誤將此由六百里加緊諭令知之○諭塔齊布會國藩奏軍營需餉孔亟懇請飭廣東四川飛

速籌解等語見在武漢甫經收復攻勦正當喫緊若餉項少缺致失機會所關非細湖南省庫萬分支絀曾國藩等因陸兵太單尙擬添募兵勇二千尤當豫籌接濟著裕瑞葉名琛柏貴等各迅速籌銀數萬兩解赴曾國藩等軍營以濟軍食廣東雖見辦土匪仍當於無可籌撥之中設法措解至四川省前由酉陽州解往之項是否業已出境並著裕瑞嚴行催趲毋任逗留前據葉名琛等奏廣東土匪勢甚猖獗致省城被圍道路梗塞日久未據續報殊深懸繫著葉名琛等將見辦情形迅速具奏以慰廑念將此由六百里加緊各諭令知之○諭本日據塔齊布曾國藩奏楚軍需餉緊急請飭籌撥等語塔齊布曾國藩帶領湖南一軍水陸並進自岳州而下克復武昌漢陽漢口乘此破竹之勢指日即可建瓴東下由楚入吳爲廓清江面之計當此事機緊切軍行糧餉尤必豫爲

籌備江西都督最爲切近著陳啟邁在於該省不拘何項迅速籌撥銀八萬兩卽行派員徑解塔齊布會國藩軍營以應急需該省於楚軍撥餉前此計解過銀七萬餘兩頗資接濟此時軍威大振乘勝直前爲萬不可失之機且自九江湖口轉戰而東卽可以爲豫章全省屏蔽其餉項沿途解送亦極便速該撫務當竭力妥籌設法運濟俾不至有停兵待餉之虞斷不准以籌項維艱藉詞推諉將此由六百里加緊諭令知之○以派員隨同湖南官兵克復湖北省城予荊州將軍官文優敘○以安徽紳民捐貲勦賊出力免英山霍山兩縣咸豐三四年額賦並永廣英山縣文武學額各一名○予安徽殉難訓導王福永祭葬世職○乙亥諭內閣御史唐王森奏私鑄大錢情實人犯請量從未減等語所奏殊屬非是此等奸民趨利冒死明知禁令所在法不容寬猶復甘蹈刑章

以身嘗試該御史既稱處以情實誠足蔽辜又稱其情可憐請從末減何自相矛盾至此且該御史亦知斬決已有數起私鑄仍未衰息是繩以重法猶恐未能盡絕奸萌乃稱齊民不專恃重典豈故示寬縱轉足以懲奸化莠乎卽如所奏或令出錢贖罪或令效死殺賊尤屬不成政體定例納銀贖罪卽徒杖以下均以有力無力爲斷若斬絞情實人犯則從無納贖之條該犯等私鑄圖利多係因貧起意豈能責納罰鍰託空言而撓憲典至此項人犯貪利玩法無論其不能悔過自新縱使真能效死而各路兵勇累萬盈千何至少此數十刑餘之人必欲藉其死力耶該御史所奏著毋庸議○革職畱任江南河道總督楊以增奏河工平穩請擇出力人員覈實保奏得旨見在缺口尙未堵築斷難准汝保奏河員且各廳節省錢糧分所當爲豈能許其優獎沽譽見好可惡已極○

丙子諭軍機大臣等勝保等奏初五日轟塌州城仍未能登時克復一摺所敘於東北一面獨詳其東南西南正西三面僅止拔柵豎梯無路可上數語逆賊止有此數豈能面面死拒若如所奏東北面進攻如此緊急則其餘各門賊守必懈何至仍以槍礮阻隔爲詞上城兵勇已有四五十人何以不見陸續攀登東西兩面賊礮旣皆移於東北何以不卽從移去槍礮之處設法攻上明係兵心未齊不能同時並舉以致先後參差彼此觀望使賊得以面面設防殊爲可恨轟開城垣至五丈有餘缺口不爲不寬帶隊各官屢傷不退將心不爲不奮此等緊要機會而顧以煙濃路窄藉作俄延坐令垂成之功失之頃刻猥云蓄養銳氣以圖再舉試思我兵養銳之時非卽逆賊堵築修補之時耶設再舉而仍復如此則克復當在何時數日總能克復之語勝保已屢屢言之大言無效

朕實爲之憤愧德勒克色楞善祿崇恩與勝保共辦一事亦不能
事事諉之主帥看此次分攻各門情形德勒克色楞等不能接應
之咎亦無可辭若再似此貌合情睽致州城仍不能破或破城之
後餘逆分路竄逸何路疏懈朕必重治何路督兵大員之罪勝保
等勿謂朕不能洞悉其隱也將此由六百里加緊諭知勝保並諭
德勒克色楞善祿崇恩知之○戊寅四川總督裕瑞奏黔匪攻陷
桐梓調派兵勇前往綦江等縣防堵情形得旨覽奏改調添調防
兵及萬福等馳赴綦江各情布置尙妥以後情形速行馳奏見在
賊數雖多皆係烏合不可稍涉張皇○賞會國藩兵部侍郎銜辦
理軍務以陶恩培爲湖北巡撫未到任前以楊需兼署賞雷以誠
三品頂帶爲江蘇布政使仍畱揚州軍營幫辦軍務以楊能格署
布政使

由蘇松
太道署

○賞幫辦軍務已革直隸提督陳金綬三品頂帶

○予湖北陣亡知縣吳振鏞等祭葬世職○己卯向榮奏八月二十一日鄧紹良帶兵行抵太平該逆聞風竄回采石我軍分營扼堵要衝二十四日賊眾由采石前來窺伺經我軍擊退二十五日有賊四五千入復由采石至黃山焚擾我軍分三路兜截誘入伏中左右排槍疊擊該逆潰奔追至采石之四喜橋是日計斃賊四五百人二十七日分兵直抵采石拆毀賊營二座二十九三十等日該逆連次分股來撲適傳振邦長桂各軍由秣陵關繞出沿江會合鄧紹良分路迎剿斬馘多名傳振邦衝入賊隊手腕被礮打傷仍前督戰逆賊抵敵不住奔潰回巢見在兩梁山與金柱關各有賊船數百隻西梁山又有賊營四座時有窺撲太平蕪湖之意查蕪湖爲上游要口該逆之所必爭該處雖有浙江甯國兵勇約五千人然皆不堪得力刻下金陵大兵實難再分見擬將前次調

赴徽州川兵一千名折回蕪湖以當前敵而令浙江甯國兵勇助
勢庶幾戰守可恃鄧紹良扼紮太平之兵先僅一千二百餘名傳
振邦折回金陵就醫所帶兵勇已併歸鄧紹良統帶亦止二千餘
人堵剿尙覺不敷惟有俟紅單等船駛上庶可曾攻上游之賊無
如吳全美葉常春各船尙寄碇浦口阻風不能上駛復據水營各
鎮稟報二十五日該逆木簍二座並賊划快船數十隻由七里洲
夾江口衝出經吳全美等擊沈賊划十數隻賊簍順流直下一靠
金山一泊鮎魚套臣已知會下游師船迅圖設法攻毀力斷賊援
見聞瓜州攻剿得手賊勢已窮鎮江之賊經余萬清堵剿亦尙得
手臣已分別咨行水陸防剿並嚴催吳全美葉常春等督飭水勇
及調到陳世忠閩勇爬船趕緊設法斷賊橋鍊會攻九洲洲賊營
疏通江路俾紅單等船一遇順風立即上駛會合鄧紹良陸路之

兵相機前進直至蕪湖庶可遏賊來源但使上游一清賊無接濟則下游次第籌剿較有把握矣 上諭軍機大臣等鄧紹良傳振邦等連日采石之戰斬獲雖不爲少但察看賊情似非悍賊死黨恐係以小勝驕我兵心而兩梁山及金柱關等處賊船復以大腿突撲該大臣既將傳振邦之兵併歸鄧紹良統帶卽著飭令該員加意嚴扼能進則進使上游對策各賊營不能安穩久踞方操勝算吳全美葉常春所帶兵船擅自折回本屬可惡該大臣既稱嚴催該總兵等速破九洑洲賊營卽上駛著卽嚴催趙提若該總兵等藉詞延宕既不速攻洲地又不進扼太平或於埭清賊巢之後又託言協剿瓜州置上游於不顧卽著據實嚴參連前此不聽節制之罪一併重懲蕪湖爲上游要口浙江兵勇旣難得力自應以勁兵協守該大臣所稱檄調赴徽川兵往蕪湖而令甯國兵勇

助勢意在酌量兵勢強弱爲布置之先後蕪湖甫經收復兵力未
充果能添兵嚴扼則徽郡之藩籬自固著將詳細情形知會黃宗
漢妥籌辦理至所奏賊鋒下駛等情與托明阿等前奏大略相同
見在賊鋒是否仍泊鎮江南岸抑又駛往下游雷以誠前赴焦山
一帶福建派來之總兵孫雲鴻亦在該處能否相度情形迅將賊
鋒設法攻燬並著據實奏聞陳世忠在段要口能否得力李德麟
已回浦口吳全美葉常春尙未上駛師船不爲不多洲地賊巢不
過兩三處何以不卽進攻瓜州已屬彈丸洲地尤爲狹小若逆匪
每占一處卽牽掣一路得力之兵何日始能肅清江面鐵鎖橫江
之技該逆前此卽已有之曾被我兵設法攻破此次豈不能照辦
况師船全在江北托明阿等卽責無旁貸著卽迅速剿除使烏江
之賊退無所踞自不敢上竄滁州等處關山全椒雖皆派有防兵

若水路不斷則陸路終不能防此係南北緊要關鍵托明阿等豈可玩泄視之耶向榮摺內有見聞瓜州攻剿得手賊勢已窮之語托明阿等如何籌攻務當迅速進剿儻一勝之後輒復停兵數日或賊匪出撲始行督兵抵禦是賊逸我勞雖有勝仗終難攻克況上游紅單船業已折回見在金陵瓜鎮賊援復通使不先復瓜州豈非前功盡棄該大臣等萬不准再事耽延任令負隅死守將此由六百里加緊各諭令知之○諭陳啟邁奏九江官軍進剿失利一摺楚北逆眾既經上游兵勇追剿得手則潰敗餘匪紛紛下竄本應及早籌防九江一郡爲江路咽喉久經該逆盤踞此次復添集賊船乘虛來犯帶兵員弁多有傷亡湖口彭澤一路仍探有匪船多隻揚言上竄此時欲保守省垣總以併力先攻九江扼其來路爲要著鄰省援兵一時難以徵調會國藩等水陸兩軍雖可指

日東下然亦不能坐待此軍任令逆倭更肆猖獗該撫見派臬司
惲光宸添帶兵勇並飭吳錫光帶勇在建昌會合務令鼓勇直前
以剿爲堵斷不准逗畱建昌致賊艇竄入鄱湖更難措手仍一面
激勵官紳民勇協同防剿以助兵力之不逮其趙如勝所領水師
與其徒令防守究不如出湖迎剿以遏兇鋒至武甯股匪尙未剿
除自應妥籌兼顧若俟彼處賊匪剿除淨盡再圖攻克九江是否
不至遲誤該撫務當通籌全局相機而行毋令有用之兵徒勞往
返另片奏江南大營糧臺仍飭原辦之員經理等語著照所請所
有向榮糧臺事宜見有彭玉雯經理其先後支用報銷著卽責成
鹽法道熊莪督率經手委員覈實造報以免輻輳將此由六百里
加緊諭令知之○予山西殉難布政使理問銜仇恩覃等祭葬世
職知縣丁璜建祠江西陣亡遊擊景星等祭葬世職○命黃樂之

來京以晏端書爲浙江按察使

由甯紹台道遷

○壬午諭內閣勞崇光奏

匪徒竄擾縣城疊經勦洗殆盡一摺廣西宣化縣匪徒梁大等膽敢竄至武緣縣境肆行搶掠並入城滋擾經該縣知縣彭昌集署思恩營遊擊李成瑞派兵集團疊加痛勦並攻破賊巢將首匪擒戮匪黨殲除殆盡該地方文武於賊匪入城肆擾雖經設法擊退並疊次痛勦究屬疏於防範彭昌集李成瑞著卽革職暫行開任以觀後效所有出力員弁紳團人等著勞崇光擇尤保奏毋許冒濫仍著督飭文武將見逃首匪陸九成等嚴拏務獲盡法懲治毋畱餘孽○楊霈奏據署黃州府許廣藻稟九月初四日督同黃岡縣翁汝瀛帶領紳團於淋山河團風桃店等處分道勦賊擒斬數百名直抵黃州城下賊匪望風逃竄下船開駛追至江邊擊斃數十名落水淹斃者數十名當將黃州城池收復該逆水陸奔竄分

泊大冶蘄州興國一帶江面臣卽飛咨桂明速由新洲前進扼要
堵剿武昌縣賊匪聞信驚惶署武昌縣知縣白潤於初五日約會
紳團數百人多張旗幟徑偪縣城西門賊匪不敢抗拒分出南北
兩門逃竄追至北門不及下船者多擠撲淹斃擊沈賊船三隻斬
十餘人當卽收復城池其漢川沔陽一帶竄匪先後捕斬數百名
數十名不等湖澤漸次肅清見在會國藩塔齊布水陸之師均已
分起下行臣先飭魁玉楊昌泗等會同桂明一同前往並飛咨江
西安徽撫臣一律堵剿以冀迅速埽除查此次收復省城全賴湖
南水陸數大戰挫折賊鋒又礮船得力將賊船大加焚毀賊之輜
重喪乏糧草無存膽落心離分蹤四竄故能一鼓克復勢如破竹
見在武昌省城空無居民衙署民房大半殘毀漢陽府城尤爲殘
破計清理街道修葺衙署民房甚需時日伏思武昌漢陽夾江對

時形勢雄闊必須有水陸重兵扼守善後事宜自以造船鑄礮練兵儲糧爲最要而經費支絀辦理匪易竊謂坐守不如進攻臣是以有以戰爲守作一勞永逸之計南省礮船分則戰守皆形不足合則攻剿實能擅長大江爲楚省咽喉鎖鑰礮船擊於上紅單船擊於下江路不難肅清江路清而接濟斷江甯鎮江之賊必可盡鏟根株否則金陵之巢穴難除江皖之蔓延日甚楚南楚北一水相連終無安枕之日聞藩司夏廷樾業已行抵長沙卽飛催速行赴任臣整頓兵勇布置防守俟藩臬兩司到省後卽當親督後隊會同會國藩等合力下擊上諭軍機大臣等見在會國藩塔齊布水陸之師均已分起東下楊需業飭魁玉楊昌泗福忻雙保與桂明會合同往並咨江西安徽一律堵剿所籌尙合機宜前降旨賞給會國藩兵部侍郎銜辦理軍務毋庸署理撫篆誠以楚北兵

威大振會國藩卽可與塔齊布同出長江以次掃蕩九江等處賊艘順流收復安慶各城不能復拘以職守卽該督等所議以戰爲守一勞永逸之計惟精銳俱出內地空虛夏廷樾已抵長沙卽著飭赴新任毋庸前往四川武漢既復岳州防務較緩並可飭令胡林翼速來楚北以資彈壓撫綏會國藩等專意東下得楊需後隊之師既可互相策應如楊需督兵會剿有夏廷樾等駐紮近省要隘亦可後顧無虞層層布置總宜計出萬全惟漢川應沔一帶湖澤旣漸肅清襄陽卽非喫緊之地豐伸前此所駐各兵應移何處截扼楊需務卽咨商王慶雲速飭豐伸擇要移防以便該督等出境剿賊崇陽縣城復被賊陷官文曾咨商楊需與塔齊布撥兵往剿該督務當戰守互資內外兼顧所稱省垣殘破善後事宜以造船鑄礮練兵儲糧爲要務自應次第舉行該督責無旁貸務當擇

要駐兵妥籌布置總期沿江痛加剿洗使該逆窺伺之心絕則楚北之民安至兵餉一節已飭四川山陝各督撫撥解並飭部迅發執照以便勸捐惟會國藩塔齊布各營軍餉向來取給於湖南見在相距路遠轉運更難該督須隨時接濟毋令匱乏襄陽等處尙屬完善仍當設法勸捐不得專恃鄰省楊需以總督兼署巡撫封疆應辦之事當飭藩臬道府等妥爲經理剿賊機宜仍須與會國藩等熟思審處江皖毗連楚鄂以後追剿情形迅速奏報以慰懸繫將此由六百里加緊諭令知之○諭本日據楊需奏黃州府武昌縣均已收復會國藩塔齊布水陸之師已分起下行等語前此搜剿蕩河賊匪會國藩奏稱細察大局尙有三端可慮當卽諭令乘此機會謀定後戰誠以克復沿江諸城在此一舉必當計出萬全斷不可稍有挫衄見在黃州武昌次第收復我兵水陸並進其

行抵何處及如何布置情形諒會國藩等必有奏報在途黃州賊匪水陸奔竄大冶蘄州興國一帶江面賊船聚泊尙多我兵乘勝追剿自必勢如破竹惟黃州而下卽係九江該郡久爲賊踞前據陳啟邁奏官軍進剿失利湖口彭澤一帶探有匪船多隻揚言上竄該撫雖已派臬司惲光宸及趙如勝等水路防剿其能否克復九江殊難豫定若上游追剿得手難保賊船不竄入鄱湖設再蔓延江省牽綴我師不能順流直下則剿辦又費周章會國藩等務當統籌全局一面迅速進兵潯江一面知會陳啟邁前後夾擊以期一鼓殲除毋畱後患至皖省久遭蹂躪安慶府城賊已踞爲巢穴勢必負隅死守况廬州尙未克復江北一帶如無爲和含等處江南一帶如池太所屬多爲賊踞太平蕪湖雖經克復兵力尙單逆匪屯聚東西梁山及金柱關等處每欲乘間窺伺徽甯以見在

情形而論向榮派赴太平之兵僅有二千餘名滁州關山及全椒等處之兵亦僅有一千七百餘名南北兩岸兵力究嫌單薄曾國藩前已賞給兵部侍郎銜毋庸署理湖北巡撫既無地方之責即可專力進剿但必須統籌全局毋令逆匪南北分竄方爲妥善並隨時知照江皖各撫及托明阿向榮等四路兜擊以期直搗金陵固不可遷延觀望坐失事機亦不可銳進貪功致有貽誤諒曾國藩等必能兼權熟計迅奏膚功也將此由六百里加緊諭令知之○予廣西殉難學正白杰祭葬世職○予湖北殉難布政使岳興阿諡剛介贈署按察使李卿毅布政使銜諡愍肅均予祭葬世職建祠知縣俞恒淳祭葬世職附祀○命山西巡撫恆春陝西巡撫王慶雲各撥銀五萬兩解赴湖北備軍需○癸未諭軍機大臣等羅繞典等奏桐梓逆匪分陷鄰縣竄逼郡城一摺此股匪徒據胸

爵遠前奏夥黨不過千餘何至十餘日間連陷兩縣旋撲郡城該地方官平日漫無覺察臨事倉卒以致文武員弁陣亡實堪痛恨該撫前調本省官兵已四千一百名加以續調各路官兵三千名兵力不爲不厚趙萬春旣已先行馳往蔣爵遠亦卽擬出省著卽督飭各路官兵四面兜剿迅速撲滅此等烏合之眾急則驚潰緩則負隅總須乘其未熾雲集環攻方不至蔓延爲患其蔣爵遠請調之雲南精兵二千名卽著羅繞典如數調撥選派得力鎮將管帶星速馳往兜截不得稍有延誤至所稱軍需無款可籌請由雲南藩鹽各庫內撥銀二十萬兩等語昨據吳振械奏滇餉久絀自係實在情形惟黔省瘠苦尤甚於滇他省又斷無可撥著該督與吳振械妥爲籌畫無論何款速行解往省城布置事宜卽責成炳綱妥辦毋得過涉張皇以致人心搖惑將此由六百里加緊各諭

令知之○諭前據裕瑞奏貴州桐梓縣城被匪攻陷派兵前赴碁江等處防堵並咨行提督萬福等馳往督辦疊據蔣爵遠等奏桐梓仁懷兩縣失守並賊匪攻撲遵義府城各情形見在蔣爵遠與提督趙萬春親帶官兵前往剿辦該處與四川之合江碁江等縣壤地毗連賊匪係烏合之眾一聞大兵雲集難免紛竄滋擾著裕瑞知會萬福並飭令曹澍鍾督帶前撥官兵迅速分投馳赴各該處擇要堵禦並著探明賊勢如果猖獗必須會剿卽令萬福等帶兵出境迎擊以剿爲堵較之株守本省邊界更爲得力毋得稍存畛域致誤機宜其見在如何辦理之處卽著隨時馳奏將此由大百里加緊諭令知之○親王銜定郡王載銓卒追封親王賞銀五千兩治喪予祭葬諡曰敏以其子一等鎮國將軍溥煦襲郡王爵○予貴州陣亡知縣陶履誠等祭葬世職○甲申諭內閣樂斌裕

瑞奏土司控案礙難依照學臣斷擬一摺四川南昌縣土婦安安氏呈控一案本係地方事件與學校無涉自應歸該管地方官秉公審辦學政何紹基輒於按試時據訴訊問咨請裕瑞從權辦理殊屬非是何紹基著交部議處所有安安氏原案仍著照該將軍總督所議辦理○塔齊布會國藩奏自武漢克復後襄河以內賊船焚勦殆盡江漢一律肅清急應乘勝進剿查此次敗竄之賊裔從解散分途回籍者約二三萬人逃赴下游回踞舊巢者亦尙有數萬人南岸之解散者爲數尙少其回巢抗拒者多集於興國州北岸之解散者爲數極眾其回巢抗拒者多集於蘄州廣濟等屬而皆以水次爲老巢以舟楫爲藏身之固屢據探稟北岸之黃州府南岸之武昌縣均已收復自巴河以下經田家鎮道士袱直至九江節節皆有賊船臣等見與兼署督臣楊需商定三路進兵南

路由臣塔齊布率湖南兵勇進兵興國大冶等處北路由署督臣

派令固原提臣桂明等率各營兵勇進攻蘄州廣濟等處水師由

江路直下楊載福彭玉麟等率前幫先發臣國藩督同李孟羣等

率後幫繼進俟抵黃州時與陸路北軍一會抵田家鎮富池口時

與陸路南軍一會北軍行至廣濟將入皖境再與署督臣商定行

止南軍則須勦辦九江後乃能渡江而北以圖疾擣安慶規復省

會該逆擄掠民船以數萬計經臣等一軍轟擊焚毀者不及七千

各省官軍焚擊者亦不過數千下游見存賊艇爲數尙復不少九

江以下必當大戰數次臣等惟有激勵士卒步步整頓以期廓清

江面 上諭會國藩等奏統籌三路進兵直擣下游一摺覽奏布

置各情甚合機宜以長江大局而論楚北上游旣已漸次肅清則

各路官軍乘勝東趨自成破竹之勢楊需前奏坐守不如進攻擬

親督後隊會合下擊今會國藩等定擬南北兩路一由塔齊布進
攻興國等處一由楊需派令桂明等進攻蘄州一帶會國藩水師
則由中路直下似此三軍齊發直搗賊巢原屬制勝上策但下游
賊踪蟻集我兵分道進攻若非首尾相顧聯絡一氣則能分而不
能合殊非兵家所宜所籌於黃州會台北軍於田家鎮富池口會
合南軍雖聲勢不至隔絕但兵機移步換形賊情亦詭詐百出總
須出奇應變步步爲營以免孤軍深入方操勝算其桂明一軍較
之楚南兵勇強弱是否相當儻彼強此弱南岸被勦緊急該逆必
致伺隙北渡該督等會否慮及此次東下之師關係大局轉機務
期成算在胸相機籌辦能制賊而不爲賊制庶可次第廓清也將
此由六百里加緊諭知楊需會國藩塔齊布並諭桂明知之○命
陝西巡撫王慶雲籌銀二十四萬兩解赴會國藩行營備餉○乙

西諭內閣諄齡奏達賴喇嘛等以賊氛未靖欲爲禱經祈令迅就
殄滅等因呈請代奏一摺該達賴喇嘛等衷悃實出至誠朕甚嘉
悅達賴喇嘛著加恩賞給哈達一塊念珠一串喀微阿奇圖呼圖
克圖著賞給哈達一塊交駐藏幫辦大臣轉給該達賴喇嘛等祇
領○諭諄齡奏哲布尊丹巴呼圖克圖呼畢勒罕可否從喀微阿
奇圖呼圖克圖受戒之處請旨一摺哲布尊丹巴呼圖克圖呼畢
勒罕向依達賴喇嘛受戒惟達賴喇嘛既係見未及歲且又未受
格隆大戒著照所請哲布尊丹巴呼圖克圖呼畢勒罕著卽依從
喀微阿奇圖呼圖克圖阿旺依什楚琛佳木參受戒傳習經呪○
湖南巡撫駱秉章奏粵匪攻撲全州調兵防剿獲勝得旨覽奏赴
援獲勝各情均悉仍應不分畛域趕緊會合剿除又奏官軍由武
昌東下請飭速籌協濟軍餉以利師行批會國藩軍餉已有旨飭

撥江西陝西兩省該營自有委員經理不必由湖南派往惟船礮實爲要需務期趕造完竣迅速東下又奏遵旨調兵赴粵援剿又批所辦尙是若有妥員可兼護提督仍應飭多順赴粵方好又奏遵查楊秀青蹤迹俟確詢明白後再行辦理又批去歲該逆自添禾乃師僞號與此相似著切實根究據實密奏梁永泰呈訴之語顯係畏罪自首○丙戌諭軍機大臣等邵燦楊以增奏洋匪肆擾趕籌會剿一摺據稱黃河海口有洋盜勾結濱海土匪肆行搶掠業經委員訪有洋匪五股每股數百人其頭目有王大老虎陳二將軍等名目時在洋面劫掠又於海灘築壘窠濠藏有槍礮器械等語黃河海口與上海洋面相距非遙見在滬城尙未克復設此股匪徒乘間潛煽沿海一帶地方更難安謐且轉瞬辦理海運若海淤沙被匪徒占踞更恐有意外之虞見經邵燦等派委中河通

判朱善張輦蕩左營守備楊鎮華帶勇會同漕河水陸各營相機兜拏惟兵力甚單按捕恐難得手著怡良吉爾杭阿卽飭狼山鎮總兵泊承陞督率水師會同勦辦務將首犯王大老虎等按名弋獲盡法懲治以清海道前有人奏吳江震澤兩縣紳民捐款大半多飽官吏囊橐當諭怡良等查明參奏本日復有人奏吳江震澤兩縣紳民捐輸軍餉制錢八萬串報解甚少州縣及董事侵吞者三萬五千串前署震澤縣知縣沈則可侵吞制錢七千串見署震澤縣知縣姚銑侵吞四千串前署吳江縣知縣師宗榮侵吞三千串見任吳江縣知縣賀際遠侵吞一萬四千串本邑董事吳懋政倪彬王禹源侵吞七千串並著怡良吉爾杭阿一併確切查明據實嚴參毋稍徇隱原片著鈔給閱看將此由五百里各諭令知之○丁亥諭軍機大臣等載齡崇實奏遵查總督收受陋規一摺並

巡捕官具供後自盡等語已有旨將裕瑞撤任聽候查辦矣據奏裕瑞自實授總督以後將各州縣向有陋規作爲捐輸練丁經費其司道規禮收存署內爲捐備槍礮火藥之用難免假捐輸之名復陋規之實自應徹底查訊以期水落石出第案關通省大小官員與受營私若紛紛提訊便有窒礙難行之處該侍郎等宜息心靜氣逐款確查訊明實係得受陋規以肥私囊各員無論總督司道及屬吏之納賄營求確有升調證據者據實嚴參亦不得含糊了事至裕瑞以封疆大員不自檢束致被糾劾該巡捕沈祖望供出實情並無不合何以悔恨輕生且與謝家蘭供詞相符何以彼此又相抱怨亦當向謝家蘭研究其沈祖望初供捏飾係如何措詞所云司員中有向伊聲稱想法供出與伊好處之言究係何員該侍郎等所接呈詞牽涉監司大員者係何事由關繫輕重若何

均應詳晰聲敘著一併確查具奏惟川省陋規已成錮習何紹基
既據以入告則該學政按試各棚有無收受各府州縣陋規之處
亦當密爲訪查至欽差查詢事件必應十分慎密何以該省官員
輒先向總督告知卽將總督撤任後又安能禁其不向藩臬告知
仍致稽延隱飾該侍郎等所帶司員不過數人其公寓內外率皆
川省官吏必須嚴絕窺探並防隨帶供事人等私通消息一有訊
出實情卽須迅速密提取定供詞便無游移變幻之弊各案亦可
速行審結所有楊得質鄭懷江兩案均照該侍郎等所議卽行提
集審辦將此由四百里諭令知之○袁甲三奏查皖省見在情形
處處喫重廬郡以南民生之塗炭賊勢之披猖早在 聖明洞鑒
之中見在湖北之賊將盡江甯之賊漸窮上游師船追趕下游艇
船開截該逆江路往來已屬不能自由南岸徽甯一帶節節設防

疊次獲勝該逆亦不敢遽行窺伺儻北岸竟無一旅之師深恐賊匪乘虛竄入必致無可措手此時廬郡西南東南情形均爲喫緊須臣親自督辦方可稍有把握而臨淮爲南北關鍵臣駐防數月聲威尙壯周圍數千里漸就安帖實不敢輕離一步再四思維不得不於萬難分身之中爲兼籌並及之計見派舉人臧紆青同知李安中帶勇一千餘名並駐防正陽關之參將劉玉豹帶兵五百名會合和春等所派遣員何桂珍先到六安相機進剿其全滁一路另派知縣徐曉峰等會同慶鳳道張光第等共帶兵勇一千七百餘名由關山至烏衣一帶聯絡駐紮與見駐全椒之署臬司恩錫防剿兼籌相機辦理臣仍暫駐臨淮以爲各路策應隨時調度並知會和春福濟妥商機宜以期迅掃妖氛又奏此次軍務之壞總由於在事諸臣各守疆域能分而不能合一處有警四處設防

究其所謂防者不過幸賊之未至未必果有把握也金陵之賊竄擾北岸統計北岸兵勇不下六七千人分布尙難周密儻萃各處防兵與之決一死戰濟以水師夾攻安有不破賊營之理見在向榮托明阿等業經飭令會剿儻能一氣掃蕩固屬大快萬一不能得手則賊營一日不破防兵卽一日難撤卽幸而賊不旁竄而老師糜餉亦於大局無補臣亟思親自督兵前往而非沿江一帶防兵及江面水師均歸節制且所需糧餉金陵揚州隨時接濟則動多掣肘萬萬不能成事刻下所尤難者臨淮爲南北衝要無論士民泣留不能脫然竟去且土匪之觀隙而動逆匪之乘虛而入到處均屬可慮無大員控制萬萬不能放心臣此次分兵兩路前進原期西南路如能得手湖北礮船趕下卽可直抵安慶以扼逆賊之吭東南路如能得手則由和無而上亦可與西南路會合一氣

長江之險據爲我有金陵廬州必可不戰自復惟事之成敗不可
知不敢以空言豫瀆 聖聽亦不敢以薄才自肩重任儻蒙 皇
上另行簡派大員迅來臨淮接辦一切俾臣得相機前進並乞恩
命假以事權雖成功未可豫卜而軀命不敢自惜硜硜愚誠不敢
不瀝陳於 君父之前 上諭袁甲三奏統籌皖省全局分兵東
西兩路夾攻一摺所籌俱是另片奏擬卽親督官兵前往等語此
時南路攻勦誠屬緊要而臨淮爲南北鎖鑰關繫尤重經袁甲三
督防數月聲威頗壯若遽令其督兵南往另派大員前往接辦一
時殊無得力之員就近派委萬一分兵之後匪黨乘機竊發於北
路關鍵大有妨礙旣據袁甲三分派臧紆青張光第等各領兵勇
前往西南東南兩路協力勦辦袁甲三卽著仍駐臨淮策應各路
見在楚北東下之師曾國藩與塔齊布桂明定議分三路直搗賊

巢一俟九江肅清卽沿江而下會攻安慶著和春福濟一面嚴督官軍迅復廬州一面抽撥兵勇相機策應楚師旣由西而東勢如破竹皖兵卽應自北而南併力夾擊務須聯絡聲援會合一氣爲掃蕩逆氛之計其全滁烏江一帶賊營尙多並著該提督等隨時飛咨托明阿向榮無分南北協力殲除斷不准稍存畛域失此緊要機會也將此由六百里加緊各諭令知之○河南學政張之萬奏今歲二月粵匪竄擾永夏後捻匪蘇添幅等占踞永城肆行焚搶旋經撫臣派令署太康縣知縣祝壇會合各邑聯莊勦捕獲勝始行逃去乃蘇添幅逃入亳境總未弋獲至五月初十日蘇添幅糾約亳州之張落刑將及萬人向永邑鄆縣城鄉一帶焚掠數十村莊彼時該處生監等紛紛赴省投遞公呈旋以已革督臣徐廣緝來省謂實係該處民人仇殺力持不可勦捕之議是以撫臣飭

祝塏回任專令徐廣縉妥議剿撫九月間臣按試陝州有永城生監等投遞公狀並接該學申報被害生監姓名公文查公呈內所訴情節自五月後七月十九日蘇添幅搶掠丁家集地方經瑚遊擊剿捕稍稍逃去旋經徐廣縉將瑚遊擊調回捻匪愈熾二十九日北掠天齊廟等處焚殺二十餘里並殺兵勇三十九人三十日焚掠清源集一帶三十餘里並殺兵勇數十人閏七月初二日又北掠會亭驛徐廣縉遇賊卽逃去三十餘里槍礮盡爲賊有會亭以南數十里內村盡爲墟該處民人屢向徐廣縉陳訴該革員總以賊係報復不可再與結仇爲詞此其呈中之大概情形也臣再四思維曷勝駭異查民間聚眾仇殺例禁綦嚴斷無任其尋仇不爲禁止之理况蘇添幅前此乘永夏失守之際肆行搶掠其爲捻首顯然可知豈可不嚴行按捕縱之肆行卽謂張落刑等雖係捻

首業經招撫卽爲良民然收畱蘇添幅助之搶掠其爲不知改行已可概見且敢與兵勇爲仇公然拒敵殺害多人其爲盡係巨匪肆害善良實屬至確若復持復仇之說存回護之見遷延時日其害伊於胡底且臣聞蘇添幅等聚眾搶掠俱頭繫紅巾設有僞王旗號已與粵逆大概相同該處南連潁陳去光固不遠光固擒匪尙未盡平設有句結貽患匪淺徐廣縉辦理歸德一帶擒匪所帶兵勇不爲寡弱糜餉亦復不少乃歲月經久迄無成效且永城被害最深而該革員從未至永城南路一行若令始終辦理恐未必能得力相應請旨飭下豫皖兩省撫臣派令得力員弁認真剿除務將著名擒首悉數弋獲以靖逆萌而安閭里上諭安徽潁亳及河南永夏一帶擒匪肆行疊經諭令各該撫等飭屬痛加剿捕總未能淨絕根株茲據張之萬奏亳州擒匪蘇添幅糾約就撫擒

首張落刑等將及萬人向永城鄆縣各處焚掠村莊殺傷兵勇似此捻匪橫行荼毒鄉里徐廣縉以戴罪大員專辦勦捕乃一任士民申訴總以不可結讐爲說且將赴勦之遊擊奉行調回並有遇賊遠逃槍礮盡爲賊有之事該革員所帶兵勇不爲寡弱何以坐視捻匪猖獗甘心退避著英桂迅卽查明如果該革員實有畏葸貽害情事卽行嚴參並督飭地方文武及防堵員弁迅速勦辦務將張之萬單開各捻首悉數捕獲不准一名漏網亳州爲該匪老巢該管地方文武斷不能以所掠地方係在豫境遂存以鄰爲壑之見著福濟嚴飭所屬一體實力接捕傾其巢穴其應如何添兵會勦之處卽著互相照會不分畛域以免此挈彼竄斷不准聽信浮言任其仇殺或遷就議撫致貽後患張之萬原摺並單均著鈔給閱看將此由六百里各諭令知之○欽差工部侍郎載齡等奏

行入川境沿途控案分別札交親提各情得旨亦應將牽涉監司大員之案簡明緣由具奏汝二人初次出差固不可含糊了事若紛紛提訊恐無了期○會國藩奏報謝恩並懇辭署湖北巡撫得旨朕料汝必辭又念及整師東下署撫空有其名故已降旨令汝毋庸署湖北巡撫賞給兵部侍郎銜汝此奏雖不盡屬固執然官銜竟不書署撫好名之過尙小違旨之罪甚大著嚴行申飭○裕瑞緣事解任以黃宗漢爲四川總督未到任前以成都將軍樂斌兼署以何桂清爲浙江巡撫調李菡爲倉場侍郎以何彤雲爲兵部左侍郎

由內閣學士遷

○戊子諭內閣和春福濟奏官紳督勇克復廬

江縣城一摺廬江自上年被賊占踞經和春等密傳貢生吳廷香等與該處紳民約定八月三十日裏應外合兵勇一擁入城當將縣城收復接斬逆黨三百餘人該處紳民深明大義約會官兵克

復城池洵堪嘉尚著和春福濟查明出力紳民練勇覈實保奏所
有該縣錢糧如何蠲免文武學額應行酌增之處並著迅速詳查
具奏候朕施恩○諭軍機大臣等前據英桂奏遵議徵收錢糧章
程當交戶部妥議具奏茲該部奏稱該撫於應入撥之地丁准搭
官票於不入撥之耗羨仍徵實銀辦理實屬兩歧應請飭令遵照
原定章程無論正雜錢糧一體搭交官票等語所駁甚是近日冊
行官票既以濟帑藏之空虛亦以平銀價之昂貴原期於國用民
生兩有裨益各省徵收錢糧搭收官票自應嚴杜抵換之弊以期
小民得需實惠該撫原奏內於地丁耗羨既有准搭官票與不准
搭官票之分難保地方官不借此影射於徵收時則全收實銀解
交時則換搭官票有心弊混不可不防著英桂就戶部指駁各情
並斟酌該省地方情形再行詳細妥議具奏戶部原摺著鈔給閱

看將此由五百里諭令知之○崇綸等奏英美二國呈出祈請各條惟民夷相爭上海欠稅廣東茶稅三條許以代奏令回南聽候查辦見已起碇出口諭葉名琛怕良吉爾杭阿酌查辦理○子安徽殉難典史馮禮彬陣亡遊擊慶麟等祭葬世職○已丑諭軍機大臣等前因廣東肇慶失陷地與梧州接壤令惠慶鎮守省城勞崇光出境勦辦或另派大員會勦總以不分畛域彼此兼顧爲要著本日據勞崇光奏提臣到省即可赴梧進勦並謂省城一帶可以無虞等語朕覽該撫所奏荔浦修仁陽朔永福永甯恭城灌陽全州等處均有匪徒滋擾亦皆係切近省垣之地張敬修專辦陽荔賊匪尙不得手臨桂六塘大墟等處被匪屯聚若不趕緊搜捕所謂無虞者安在該撫因廣東軍務緊要出省不宜稽遲究竟出省後近省州縣匪徒作何辦法桂林根本重地恐非藩臬等所能

鎮壓惠慶進省固須妥籌防剿事宜勞崇光亦須兼顧桂林各屬
不得以親赴梧州辦賊置本境於不顧梧潯所轄各縣新起匪黨
亦須督飭各該府迅速撲滅勿令與東匪勾結前據略秉章奏近
省匪徒漸次解散佛山匪眾散去亦多韶州道路漸通惟連州等
城三江星子平石各市鎮仍有賊踞乃閱勞崇光此奏除肇慶順
德高明惠來外尚有花縣德慶等十四州縣失守之事並聞省城
尚未解圍是否傳聞異詞抑因道路梗塞偵探不確之故著卽疏
通驛道飛探速奏並將退回緊要公文設法投遞廣西地瘠民貧
久遭蹂躪催徵不易固屬實情然亦須督飭司道各官竭力徵收
多完一分錢糧卽多充一分經費豈能束手無策任令民間觀望
勞崇光身膺疆寄總當內外兼籌不得顧此失彼惠慶職任提督
亦屬責無旁貸該撫仍遵前旨會同該提督將本省防剿機宜嚴

密布置毋得稍有疏失將此由六百里加緊諭令知之○予廣西陣亡巡檢婁泰等祭葬世職○庚寅諭軍機大臣等據樂斌裕瑞奏四川防堵緊要裕瑞擬帶兵親往瀘州堵禦黔匪並片奏出省後載齡等有應行查詢之處行文至行次咨查各等語該處與黔省仁懷桐梓等縣毗連情形均關緊要惟計見調兵勇已有三千六百餘員名又有萬福等駐紮督辦似已足資堵禦裕瑞既經撤任且有應行詢查之件著載齡等察看情形如無須裕瑞前往卽著咨行折回就近查問儘情形實在喫緊該侍郎等卽會同樂斌斟酌緩急另派大員前往督辦至裕瑞此次添調懋功等營兵及各練勇仍飭令原派之參將高克謙等帶往瀘州等處聽候調遣其黔匪由九壩入川之信及張貼偽示各情並見辦情形均著確切查明迅速具奏將此由六百里各諭令知之○諭勝保自前奏

初五日轟塌州城以後久未將攻勦情形入告本日據奏十二十八等日兩次進攻雖缺口之處該逆未敢堵築而拒守益力我兵輒中暗傷勝保等未能卽時攻克又以添造擋牌各器具稽延時日朕覽奏之餘倍深焦急豈該大臣等身履行間轉漠然不知愧奮見在攻具造齊已定剋日分三路並攻之舉若仍如前次奏報東北城垣已陷而各門不肯同時並進統帥之罪固無所逃卽德勒克色楞等分任勦賊之責亦豈能屢從寬假逆賊能得夥黨之死力我軍卽宜策各路以齊心據稱東北垣缺陷數丈該逆併力專注在此我兵進攻較易亦在此若此路可破自能一擁登陴然亦須於東南西南正西三門糾約齊備同破賊巢使逆匪奔救不暇則柵壘雖堅必不能處處抵禦攻堅攻瑕隨時策應斷無以數百賊黨能爲四面設防之理前此功敗垂成皆由帶兵大員彼此

觀望所致一誤豈堪再誤朕於該大臣等疊次訓諭已極詳備若再遷延推諉徒以勦辦費手及不勝慚憤虛詞入奏豈該大臣等籌畫數月智計反不如賊耶論功罰罪惟該大臣等自取何路退縮卽將何路統兵大員治以應得之罪亟圖克復毋失事機將此由六百里加緊諭知勝保並諭德勒克色楞善祿崇恩知之○辛卯諭軍機大臣等孫晉墀奏諭令考試童生捐輸報效錄取入學等語所奏斷難准行該學政職司校士衡文是其專責卽偶有勸諭生童捐輸實爲考試以外之事乃始則以監生報捐教官爲請業經部駁今復以童生捐輸入學爲請有意割辦冒昧瀆陳該學政旣知憑文取進人情所貴改爲捐納卽非所願則此項捐輸入學豈能掩人耳目況捐項則榜示轅門試卷則暗加圖記掩耳盜鈴相率爲僞士子初登庠序卽以欺飾進身尙安望學校之中敦

品勵行乎該學政又知報效之人不能各處必有則所得少而所失多所謂廣儲經費者安在至以取進不能如額每榜必有冒濫等詞公然形諸奏牘尤不成話定例考試不敷進取原許缺額豈有准其冒濫之理該學政既自居於冒濫之實又貽士子以賄買之名仍無補於國家經費似此謬論尙自稱成敗利鈍實繫乎此至以請置極刑以謝天下自矢何不知大體若此豈必如此措詞始能仰邀朕許耶所請著不准行亦不准再有瀆請將此諭令知之○壬辰諭內閣禮部奏遵議琉球貢使暫緩赴京一摺琉球國王久列藩封該貢使等航海輪誠具徵忱惟見在用兵省分尙未能一律肅清若令繞越程途跋涉遠來轉非所以示體恤著王懿德於該使臣等貢船行抵閩境後卽行宣諭朕意令其此次毋庸來京仍優與犒賚委員妥爲護送回國所有進貢方物卽著賞

收由該督等派員送京其應行頒賞該國王世子及使臣等物件
著該管衙門查照舊章備辦發交該督等派員齎送轉給祇領以
示朕懷柔遠邦至意○癸巳僧格林沁等奏近日逆匪仍前死拒
百計誘引堅匿不出十三日僧格林沁督帶官兵直至賊壘木
城該逆拌死抗拒正見進攻之際忽有多匪衝出意在鈔圖官軍
分投痛剿斃賊甚多我兵受傷四十餘名十五日又復進攻該逆
負固死守並無一匪出巢止在壘內施放槍礮密如雨下我兵仍
未得手茲據投出之人供稱賊營所作呂公車前推容易拉回極
難最怕重濠揆之賊情此時未卽衝撲者諒因防守周而是以遲
疑不敢輕試並訊得該逆已決空河隄引水東面意欲乘船撲出
其情形慌張已可概見二十四日夜逆匪撲向瑞昌營牆經官兵
登時擊退臣惟有會同各路統帶將士設法竭力進攻及早掃蕩

以贖愆尤 上諭軍機大臣等此次接仗雖屬得手但僅僧格林沁一路進攻其各路帶兵大員何以不同時並進殊不可解況我兵受傷者亦復不少究竟如何接仗情形亦未詳細聲敘該逆一經挫敗卽負隅死守已成慣技惟在我兵設法誘敵或潛師襲取四面環攻斷不能因賊不出巢遂致束手無策該大臣屢次奏稱賊糧缺乏何以數月之久尙能固守況賊中槍礮尙多可見該逆米糧火藥並未斷絕且恐附近愚民暗中接濟似此曠日持久殄滅無期該大臣統領全軍貽誤之罪又將誰諉據稱逆匪決空河隄引水東面欲乘船撲出是該逆已欲乘間竄突該大臣等務當剋日進攻一面杜其竄路毋得再事遷延致干重罪將此由六百三加緊諭知僧格林沁並諭西凌阿知之○諭托明阿等奏上下游江面防剿情形並向榮奏金陵獲勝及截剿賊陣各等語詳覽

所奏金陵瓜州兩處均係陸路得勝而水路前次下竄之賊鍾尙未燬滅該逆又從下關江口續行竄出木簞二座雖經吳全美李德麟等追至八卦洲並知會葉常春等各路師船一面分幫下追一面迎兜夾擊而賊簞一座業已駛至鎮江其在八卦洲閣淺者向榮有連日圍攻未能卽燬之語托明阿等則稱於十九日夜間焚燒殆盡究竟是否燒毀惟吳全美等既未能盡數追剿葉常春及石埠橋段要口高資港等處守口之船復不能實力扼截致該逆游行無阻見在下游十分喫重焦山水師以風色未順尙難上駛雷以誠因桂花莊爲東路緊要之所業已折回著卽嚴催孫雲鴻張攀龍等趕緊行駛將木簞極力剿除若謂木簞寬長堅厚師船不能攏近火彈亦難然燒我軍卽束手無策安用此水營將弁爲耶浦口洲地賊營久未殲除陸路急攻則由水路奔竄向榮已

提紅單船十隻到石埠橋與吳全美等船犄角屯泊著卽飭該鎮等設法斷其鐵鍊浮橋先清九洲之賊其段要口地面責之陳世忠等毋令再被竄下鎮江賊簿責之陳國泰孫雲鴻周士法等期攻毀儻再任意玩忽不知愧奮卽著嚴參懲辦此係南北關鍵最爲緊要向榮托明阿等務當分催水軍及早肅清江面瓜州久未能攻克雖疊報勝仗於事何濟該逆每踞一地我兵卽多一路牽掣若托明阿等不能迅破賊巢向榮亦不能攔截續竄之賊踪則統帥貽誤之罪與各鎮將相等朕亦必執法從事諒該大臣等不敢仍前玩泄也至托明阿等奏兵丁口糧每月每名照舊章支給外酌加銀一兩四錢謂比較近例已節省一兩有餘等語所奏殊未晰兵糧給米原以濟餉之不足若各路軍營紛紛奏請酌加所謂節省者安在著該將軍等再行詳覈分晰具奏候旨遵辦

將此由六百里加緊各諭令知之○諭前因廣東匪徒滋擾驛路梗阻該省發遞摺件經葉名琛等奏由海道便船專委差弁齎赴浙江由浙江撫臣交驛馳遞俟奉到批摺仍令原弁由海道齎回是以八月十七日批回摺件仍發至浙江轉遞黃宗漢接奉後想已妥辦本日葉名琛等摺報聲明仍由海道前來茲將該督奏摺並寄諭要件並交黃宗漢飭交原弁速附海船齎回此後粵東文報由浙經過並著飭令各該地方官妥備海船迅速轉遞毋稍遲延惟黃宗漢數月未經奏事福建按察使崇恩在浙病故未據入奏直至該旗呈報始行簡放豈浙省摺報竟有遺失殊不可解微甯防堵情形作何辦理均著黃宗漢詳細速奏以慰朕念將此由六百里加緊諭令知之○諭葉名琛等奏賊匪攻撲省垣並東莞等處剿辦情形各摺此次摺件係七月初六日拜發因在清遠縣

屬被賊攔截十七日由海道馳遞詳覽所奏各情均係七月初六日以前情形自接閱該督等閏七月初六日奏報後迄今兩月有餘未據續報屢次降旨詢問該督等近日賊情能否遞到亦未可知似此驛路梗阻殊深懸繫前據駱秉章奏省城佛山之匪漸次解散韶州道路漸通又據勞崇光奏稱除肇慶順德高明惠來失守外尚有花縣等十四州縣失守之事並聞省城尚未解圍所奏各情亦屬傳聞異詞並未能偵探明確究竟此時省城曾否解圍各州縣賊匪如何剿辦殊難懸揣前有旨令福建湖南各調兵一千名馳往協剿近復諭令王懿德調閩浙水路官兵二三千名由海道駛赴廣東以資援應該督等即可飛咨閩浙迅速撥往以期厚集兵力將賊匪次第掃除該督等務當督率滿漢官兵並激勵紳團招集壯勇先將近省一帶匪徒撲滅則剿辦各路自易得手

該逆事起倉卒裹脅雖多究係烏合之眾若能一面攻剿一面設法解散賊勢自孤但不可稍事遷延以致無從著手將此由六百里加緊諭令知之○予廣東陣亡副將崔大同等祭葬世職○撥粵海關稅銀三十萬兩備廣東軍需○甲午諭內閣本日詹事府少詹阜保因署佐領圖記謝恩摺內將伊名阜保繕寫錯謬當時交軍機大臣等傳伊辨認不獨不曉文理且不識字實屬可惡阜保身爲滿洲世僕雖由文進士出身亦應識認清字且佐領事務清字較多阜保不識清字竟將滿洲根本甘於棄舍阜保著以庶子降用其所署佐領圖記著該旗另行揀員奏署阜保著毋庸署理○諭軍機大臣等前據載齡崇實奏遵查總督收受陋規並巡捕官具供後自盡等語當降旨將裕瑞撤任諭令該侍郎等逐款確查並將巡捕沈祖望何以悔恨輕生各情確查具奏茲據裕瑞

奏稱沈祖望之妻曹氏呈控欽差徇親供以致伊夫情急自盡
詳閱所控原呈雖係一面之詞但沈祖望自盡後傳知成都府知
府及成都華陽縣兩知縣照例相驗該府縣奉總督面諭竟不相
驗而裕瑞則奏稱該侍郎等將沈祖望傳去如何身死並未咨明
與載齡等前奏亦不相符所有沈曹氏呈控伊夫被徇情急自盡
等情著交樂斌會同載齡崇實秉公查訊具奏毋稍徇隱其沈曹
氏原呈內有欽差行至新都耽閣一日之語該侍郎等奉旨查辦
事件何以中途逗畱並著載齡崇實據實覆奏裕瑞摺並沈曹氏
原呈均著鈔給閱看將此由四百里各諭令知之尋奏沈曹氏於
沈祖望死後誤聽傳聞猜疑具控並非有心誣指毋庸置議沈祖
望投井自盡載齡崇實卽行飭驗該府縣稟稱有隨帶司員諳習
相驗並非裕瑞諭令不驗至驗明後卽由該府縣具文通報故未

知照總督至載齡崇實於八月二十五日行抵新都距省城五十里因前已行知二十七日抵省是以二十六日暫住一日報聞○兵部尚書魏元烺卒予祭葬諡勤恪賞其子戶部員外郎亨琛郎中孫刑部學習主事錫綸候補主事○以翁心存爲兵部尚書調許乃普爲戶部右侍郎轉陶樸爲禮部左侍郎以李道生爲禮部右侍郎出通政使遷○是月緩徵河南光州等三州縣被水被雹村莊新舊額賦免山西洪洞等四縣上年被擾地方額賦展緩廣西賓州等十一州縣及田州上林等十一土州縣並何旺堡地方額賦兵米有差